

顯無邊佛土功德經

與華嚴經
壽量品同

唐三藏法師玄奘奉 詔譯

如是我聞一時薄伽梵在摩揭陀國闍寂法
林坐妙善提金剛堅固無量妙寶共所莊嚴
紅蓮華臺師子座上與十不可說俱胝那庾
多百千佛土極微塵數大菩薩俱及諸天人
阿素洛等無量大衆前後圍遶爾時會中有
一菩薩摩訶薩名不可思議光王承佛威神
從座而起頂禮佛足合掌恭敬而白佛言世
尊諸佛國土時分莊嚴有勝劣不佛言善男

子我此索訶世界釋迦牟尼佛土一劫於極
樂世界無量光佛土爲一晝夜極樂世界一
劫於迦沙幢世界金剛堅固歡喜佛土爲一
晝夜迦沙幢世界一劫於不退輪音世界極
妙圓滿紅蓮敷身佛土爲一晝夜不退輪音
世界一劫於絕塵世界法幢佛土爲一晝夜
絕塵世界一劫於明燈世界師子佛土爲一
晝夜明燈世界一劫於妙光世界遍照佛土
爲一晝夜妙光世界一劫於難超世界身放
法光佛土爲一晝夜難超世界一劫於莊嚴

世界一切神通慧光王佛土爲一晝夜莊嚴
世界一劫於鏡輪世界月覺佛土爲一晝夜
善男子如是世界展轉漸增滿十不可說俱
胝那庾多百千佛土極微塵數世界佛土最
後世界佛土一劫於蓮華德世界賢德佛土
爲一晝夜於彼世界諸菩薩衆修治殊勝普
賢行地善男子如諸世界晝夜漸增如是諸
佛壽量身相菩薩世界莊嚴亦爾由彼有情
福轉增故若有善男子善女人聞此顯示無
邊佛土功德法門歡喜信重受持讀誦如理

思惟廣爲他說臨命終時十方佛土無量諸
佛皆現其前慰喻讚美令其增進無量善根
隨願往生諸佛淨國乃至無上正等菩提於
生生中常憶宿命修菩薩行速得圓滿時薄
伽梵說此經已不可思議光王菩薩摩訶薩
并諸天人阿素洛等一切衆會聞佛所說皆
大歡喜信受奉行

顯無邊佛土功德經

釋

[illegible]